

Plenchi

Bèl a bati

Subi subi nos plenchi di skol pa nos por enterkambia riba loke ta pasa den skol. Nos ta wardabu ansioso tur siman pa nos por pasa un ratu agradabel huntu. Bo a kue un kòpi kòfi kaba, of un te di yerba pa limpia e stoma. Korda ku de bes en kuando mester duna e motor un bon limpia. Pues mester freska hasta dal un remedi pa limpia e tripa kore ku tur e bakterianan ku por kousa malestar. Antes e kos e no tabata faya. Sigur dos bes pa aña wela ta pone tur hende kou bals di prugashi pa asina bo pasa un dia ta limpia stoma i tripa. Lanta un dia purba bebe kosnan natural so i si por solamente awe henter dia i no kome nada ku suku aden. Suku ta un di e peor enemigu di nos salú.

Nos mester di bo, kuida bo salú pa nos por disfruta tur djasabra riba plenchi. Nos tin ya 6 siman di skol tras di lomba. E prome tutsnan ta kuminsá e dianan ku ta bai dreña. Korda laga nos kuminsa mesora ku un bon start. Un mal start ta strobabu henter aña. Kuminsá trempan ku e disiplina, esaki ta importantísimo pa èksito.

Mayornan stimulá boso yunan traha nan skema di siman pa henter ana eskolar. Ki ora ta siña tur dia i ki ora ta relahá. Anto ora tin e tutsnan mester traha un skema kon ta bai siña intensivo pa kada tuts. Den bida tur kos ta kai lanta ku un bon struktura i disiplina. Si bo bida no tin struktura, si bo no por plania i tenebu na bo plan bo ta bai tin problema serio. No drumu lanta i wak kiko lo pasa awe. For di anochi bo mester tin bo plan di dia kaba den bo kabes.

Orashon

Tata Santu, Abo nos ta alsa.

Tata di bondat, yena nos kurason ku amor i misericordia.

Tata di pordon, yena nos kurason ku arepentimiento i pordon.

Tata di lus, yena nos ku Bo lus i speransa semper.

Amen.

Den agènda

5 di oktober dia di dosente

Liber di skol 5 pa 9 di oktober

Riba roster



St. Albertus College

Lès di kòmputer a start i aki nos por mira esnan mas chikitu den nan promé lès di kòmputer pa e aña eskolar aki

Not'é riba bòrchi



Bista di kon bunita kurá di skol st. Albertus College ta kedando. Hobennan di skol mes ta kuida e matanan. Importante nos stimulá hobennan pa kuida i apresia naturalesa. Mata ta trese “zuurstof” i esaki ta fuente di bida.

Riba rapòrt

Kampionnan di Tènis ku ta alumno di Radulphus College ta haña homenahe na skol. Pabien hóbennan. Sigui bria.



Mi ta konta

Ken su problema

Un raton a spanta ora el a mira ku e homber di kas, Gino, a kumpra un rattental. Tur tristu el a bai bai bisa e galiña di e problema ku e ta premirá. E galiña no a mira e problema komo di dje. El a rospodé mesora ku esei no ta

su asunto. E raton a kore bai serka e porko pa konté di e problema. E porko a murmurá: “Ya esei ta un problema grandi pa bo, kuida bo kurpa.”

E raton a kore bai serka e baka pa konté di su miedu. E baka a kontestá: “Ratonsito mi ta kontentu ku ami no ta na peliger, ki mi por bisabu..dil ku bo problema.”

E raton tristu sin niun apoyo di su kompañeronan a bai drumi tur preokupá. Mardugá tabatin un zonido den kas. Komo e señora di kas, Angie, ta drumi leve, el a lanta bai tira un bista. Loga e rattental a kue un kolebra su rabu. Angie sin sa e yega serka anto e kolebra a mordé. Angie a bira asina malu ku e meser a bai hospital. Despues di un siman el a sali, pero tabata swak. Gino a mata e galiña pa traha sòpi pa su dushi. Pero dianan a pasa sin ku Angie a mehorá. Famianan a bin di leu ora nan a tende di estado di salú di Angie. Ku tantu hende den kas Gino a hañe ta mata e porko pa alimentá tur presente. Despues di un siman Gina a bin fayesé. Pa por a kubri e gastunan di entierro, Gino mester a bende e baka.

Despues di tur kos Gino ku e raton so a keda biba den e kas. E rattental a bai tira afó ku e kolebra na dje.

Un prenci

Un prenci pa Road Runners Club Korsou ku a hasi donashon na Kolegio Soeur Herman Josef.





Awe tabata un mainta bendishona , yufrou Audry a habri siman na Kolegio Soeur Herman Jozef i skol tabatin bishita di Road Runners Club Kòrsou ku a bin hasi entregá di un chèk na skol .

Resientemente tabatin un kaminata organisá pa R.R.C.K i loke a recaudá di e kaminata aki a wordu otorgá na skol.

Mucha djispou

Wancho a bira hopi malu i a keda interná den hospital. Chicu a bai bishité i a keda preokupá di wak su amigu malu. El a sali pafó i a hala e “hoofdzuster” un banda i a puntré:

“Zuster kon bo a kalkulá e chèns di Wancho mi amigu.”

Zuster: “Awel nul kòma nul, e no ta mi tipo. Mi no gusta homber kabes limpi.”